

## Yhud Wosho Kindo

Yhud wohso b guut'e boamanerawon amantsuwotsi araat kooti dano bad'iru ashuwotsatse krstiyaniwots bo tooko korbodek'etwok'o k'alosha. B gitsotse b dettso P'et'ros guut'ts gitlts arts b woshts k'awnanitse guut'tso «Aaniyi iwisherawok'on Ik'o bi ashuwotssh ikonoton b imts imnetiyats kup'de'err bo k'iretwok'owe» nababirwotssh kup'idek't mani b gawiyiri.

### **Jamon mas'aafan bdetstso**

Kindo 1-2

Kootetsi dano danifwots daniyo, bo doyonat bodih dihon 3-16

Bo amantso korbodek'etwok'o izets izo 17-23  
Deero 24-25

<sup>1</sup> Iyesus Krstos guutso Yak'ob eshwi wottso Yuhudoke, S'eegetswotssh, Nihon Ik'on shuneetswotssh, Iyesus Krstosn kotets jametswotssh.

<sup>2</sup> Maac' k'ewo, jeenonat shunon itsh ayowe.

### *Kooti dano danifwotsi*

<sup>3</sup> Shuneetswotso! Ik wotdek'at nokashts kashi jango itsh guut'o ayidek'at geeyatniye tteshi, andmo aaniy iwisho b geyrawook'on Ik'o bi ashuwotssh iknoton b imts imnetiyi jangosh kup'de'er it kaaritwok'o itsh guut'o ayidek't geyiko taash bwoti. <sup>4</sup> Boats angshetwok'o ay duroniyere

shino bojangosh guut'etswots mut'at itits kin-drnee, bohe Izar Izewerko s'aato gusiya beyon wonitwots Ik'o Ik'irawwotsiye, no doonz b s'uzi wottso Iyesus Krstosnor haalitone.

<sup>5</sup> Jaman shin shino iknoton it dankawotiyalor doonzo Gbs' datsatse kisht b kashitsok'oonat amanerawwotsnowere il b t'afitsok'o itsh gawiyo, shunfee. <sup>6</sup> Boon naashiyetsatse beshat bobeyoko fakshk'rts melakiwotsi aab s'iilere, Ik'o boon angshi eeno aawotssh bborfetso dúre dúri tipoon, nic' etts t'aluwots kotdek't beezree. <sup>7</sup> Mank'oon Sedom, Gemoornat bo gúúratsi kitwotswere gusiyetswotsi bowoti, niwalonowere gobo\* boami. Mansh bo dúre dúri taawon sezeyirwotsi ariyetswotsi woternee.

<sup>8</sup> Mank'owere ashaanots bo gúmon jisheyat bomeetso bokimshiri, naashwotsshoor aleraknee, darotse mang detstswotswere boc'ashiri. <sup>9</sup> Melakiwotsitsi naasho Mika'elwor dab Muse duuni jangosh Diyablosnton b mooshor «Ik'o neen fayowe» eta b eti bako c'asho c'ayatse. <sup>10</sup> Ashaanotsmó t'iwitsdek'oosh bo falaaw keew jamo boc'ashiri, gaw dek'falaw dini s'otswotskok'o bo azeewon bodants keewo fa'e wotiyalor dab bine bot'afiti. <sup>11</sup> K'aayen werindon boamtstotse, gizosha ett Bele'ami dáriits weeron bo dihitsotse, K'oree Ik'o b k'eftsok'o boowere k'efat bo t'aftsosh indowe boosha! <sup>12</sup> Ashaanots bo jitserawo gusiyon ikwotar moonat úshoke bodatsewor itsh

---

**1:7** 7 Aze. 19:1-24 \* **1:7** 1:7Gobo: Grik mas'afatse k'osh atsonon (meetsonton) bo gonkeyi etfe. **1:9** 9 Dan. 10:13, 21; 12:1; Bek'. 12:7; Iwi. 34:6; Zek. 3:2 **1:11** 11 Aze. 4:3-8; Taaw. 22:1-35; 16:1-35

t'uge bowotititi, bo boshiyaniriye botookk mec'eroshee, jongon gifiniyeyiru, awsh deshaw dawnok'one, shuu daatseef shashotse dab shuu biyatse daatseraw, b s'ap'ootse wat'ere gitoto shuuk'ts mitok'one. <sup>13</sup> Bo, fayiru aats k'ari fuundok'o boon jitsits fini úmbo kishirune, nyic' etts t'aluwo dúre dúrosh boon b kotirwotsnat hake bako jawriru k'eenwotskok'one.

<sup>14</sup> Adamatse tuut shawatl gubratse shuwetso Henok bek'on bkeewor hank'o etre, «Eshe doonzo ay tats kum b wosh nana'a S'ayinwotsnton wotde jametsats angshosh weetwe. <sup>15</sup> Doonzo bin Ik'iraw ashmanots bofints gond keewatse tuutson sezeitwe, Arikon doonzo bin Ik'iraw morrets hanotsi biyats bokeewts gond keew jamwotsatse tuutson bo atsats angshitwe.»

<sup>16</sup> Ashaanots jam aawo mumudfetst ik keewonor genee'úweraknee, botook gond tewni jafrats sha'irwotsiye, bonono míshi keewon s'eenke, botook keewo geeyat asho weeralo bo dáshiri.

### *Boatso korbodek'etwok'o izets izo*

<sup>17</sup> Shuneetswotso! Itiyere! Nodoonz Iyesus Krstos woshetswots haniyere shin bokeewts keewo gawde'ere. <sup>18</sup> Bo «Dúri s'uwatse Ik'i hasabiyatse wokat bo took gond tewno shuuts sha'iru c'aashetswots weetune» itsh etrne boteshi. <sup>19</sup> Boye ash dago gaakirwotsiye,

meetsi tewni jafrats sha'irwotsiye, S'ayin shayronowere deshawotsiye. <sup>20</sup> T mashotso! jamoniyere bogo s'ayin wotts it imnetiyon it tooko agosh kup'ore, S'ayin shayiri angonowere Ik'o k'onwere. <sup>21</sup> Nodooz Iyesus Krstoswor b'mac' nefon dúre dúri kasho itsh b' betsitwok'o korde'er it tooko Ik'i shunoots korde'ere.

<sup>22</sup> Git nibetsdetswotssh ashuwotssh maac'o k'ewore, <sup>23</sup> Ik ikwotsi taawotse kishde'er kashiwere, k'oshwotssh shatoon maac'o k'ewore, bwoteferor morron kiimts bo atso t'awits tahman b' oorerawo shid'ere.

### *Udon Ik' k'ono*

<sup>24</sup> It dihrawok'o woshitwonat eeg eeg deshawotsi woshr geneúwon b'mangi shinats t'intsoh falitwosh, <sup>25</sup> B s'uz noosh no ato wottso Izar Izewersh, nodooz Iyesus Krstos weeron shintson tuur, dúre dúrosh mangonat, baatson, kup'oonat alonwere wotowe! amen.

## **Handr Taara**

### **The New Testament in the Borna Language of Ethiopia (Handr Taara)**

copyright © 2018 The Word for the World International

Language: Borni (Borna)

Contributor: The Word for the World Southern Africa

#### **Handr Taara**

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412